

# † Florentin Monn (1953–1983), Sedrun

Ei il ruaus nocturn disturbaus dil cunfar quotidian, lu san ins ch'igl ei capitau enzatgei extraordinari. Quei ei era stau il cass la notg dils 29 sils 30 da zercladur. Il giuven Florentin Monn, da Sedrun, era aunc buca returnaus d'in tur da cristallas ed ils ses da casa vevan alarmau la colonna d'agid e la guardia da salvament cun aviun per encuir il giuven cavacristallas. Pér suenter gentar era el semess sin via cull'idea da vegnir a casa ad ura ed en temps. Dieus ha denton disponiu autruisa: il car Florentin ei buca turnaus pli. Leusi ella greppaglia da Cuolm da Vi vev'el engartau in bien gatti, in fuorn ch'el leva explotar. Tgi sa co igl ei iu? Las bleissas ein diras, ils tschenghels graschels, la greppa malguesa e crappa sa ei era vegnir giudora. In pign discletg, in malpass e gia eisi capitau. – La damaun dils 30 da zercladur ha la colonna d'agid anflau la bara dil vescal cavacrappa al pei dalla greppa, sur Gonda cotschna. In avis per tuts cavacristallas ed alpinists dad esser precauts.

Florentin Monn ei naschiuss ihs 12 da settember 1953. Ses geniturs: Ignazi Monn e Margreta, nata Tuor, han giu bien quitaui per l'educaziun da lur 4 mattatschas e 2 buobs. A Sedrun ha Florentin passentau sia affonza, cheu ha el era frequentau las scolas primaras e secundaras. Dapi 12 onns era el autist tier la Bieraria «Calanda» a Cuera. Cheu era el stimaus e respectaus sco bien e fidaui colluvrer. La nu-



merusa participonza al til da bara ha documentau quei eclatantamein.

Robusts, gagliards e temeraris ei il preziau defunct adina staus. Quellas qualitads ha el era saviu impunder el militar sco grenadier-paracurdader. Tgei tschaffen ch'el ha giu uonn cura ch'el ei vegnius promovius sco appuntau. Dalla profunditad ha il tra passau mai giu tema e gest quella ei la finala stada siu destin.

Ils 3 da fenadur ha in grond conduct da bara accumpagnau il Florentin alla fossa, in'enzenna ch'ei era reussiu ad el da gudignar en sia cuorta veta bia simpatia ed attaschonza. – Dieus detti al car defunct il ruaus perpeten ed als ses la forza da supportar la greva frida d'in criu destin en resignazion cristiana.

V.B.